



Rebecca est enuoyée du consentement de son pere Bathuel en Chanaan, où Isaac la reçoit, & prend à femme.

L A B A N & Bathuel ayans veu que ce qui auoit esté fait par le seruiteur d'Abraham, qui estoit enuoyé exprés pour paruenir au mariage d'Isaac, estoit vne œeuure procedée du Seigneur, en ce que Rebecca auoit esté preléuë entre toutes les autres. Ils ne voulurent differer de l'enuoyer à Isaac pour femme, & ses parents qui ne la pouuoient laisser qu'à regret, prièrent le seruiteur de tarder dix iours ; mais s'excusant leur dit, Ne tardez point, puis que le Seigneur a bien dressé mon chemin. Lors ils dirent, Appellons la fille, & luy demandons son consentement, laquelle s'accorda d'y aller : Ses parents lors la benirent, disans ; Sois fertile par millions, & que ta semence possede la porte de tes ennemis. Adonc Rebecca, sa nourrice, & sa chambriere, monterent sur les chameaux, & suiuirent le seruiteur d'Abraham, lequel print charge de Rebecca, & s'en alla. En ce temps-là, Isaac venoit par le chemin du Puy du viuant & du voyant, & estoit sorty pour mediter aux champs sur le soir ; & en esleuant ses yeux vid venir les chameaux, & Rebecca, laquelle voyant Isaac, voila sa face ; & le seruiteur apres auoir recité à Isaac tout ce qui auoit esté fait en son voyage, Isaac receut Rebecca à femme, & l'aima, puis la mena en la chambre de sa mere defunte Sara, & lors modera la douleur de la mort d'icelle.